



## **Ned ning sën wa n maana Mam noang beem, ad M segla a soab ne zabre, la Mam yamba ka yɪ sën na n pëneg Maam ne bũmbu, tɪ noom Maam n yuud Mam sën maan faril ning n rogl-a wã ye**

Yii a Abu Hurayrat nengë, (Wënd yard be a yïnga), a yeelame: Wënd Tën-tuumã (Wënd puusg la A tɪlgr be a yïnga) yeelame: «Wënd yeelame: Ned ning sën wa n maana Mam noang beem, ad M segla a soab ne zabre, la Mam yamba ka yɪ sën na n pëneg Maam ne bũmbu, tɪ noom Maam n yuud Mam sën maan faril ning n rogl-a wã ye, Mam yambã ka bake n pënegd Maam ne naafil-rãmba, halɪ tɪ M bu a nonglem, M sã n bu a nonglem, M lebgda a wumb ningã a sën womdã, la a nifr ning a sën getã, la a nug ning a sën yõkdã, la a naoor ning a sën kënd ne wã. A sã n kos Maam, M na kõ-a, la a sã n kos Maam gũudum, M na maan-a gũudum, la Mam ka maand maas-maas ne yell Mam sën na n maan-a wala M sën maagd lɪslaam yõor yãkr ye, a kisa kũumã, tɪ Mam kisg a wëngã maanego».

[Naşun Şahıhın (Gom-sikdem sën manege)] [A Al-Buħariy n togs-a]

Nabiyadã (Wënd puusg la A tɪlgr be a yïnga) kõo kibar hadiis yɪleng-kãngã pugë, tɪ Wënde, (A Naam yɪ wagell n zëke), A yeelame: ned ning sën namsa Mam noanga, sën yi M nong-rãmbã pugë, la a nams-a la a kisg-a, ad Mam vënegda M beem ne-a. La waliy yënda la: sɪd-kõta, sën yaa Wënd zoeta, la yamb sën wat n tar sɪd-kũun la Wënd zoεgã tɛk la yë paamd puur Wënd nonglemë wã. La lɪslaam ka pënegda a Soabã ne baa fuɪ ne bũmb sën noom Wënd n yuuda, A sën maan tɪ yaa tɪlae n zao-a, sën yaa tũudumã maaneg la haraam-rãmbã basgo, la lɪslaam ka bake, n baood pënegr ne a Soabã, ne naafil-rãmba la faril-rãmba halɪ t'a wa paam Wënd nonglem. Rënd Wënd sã n bu a nonglem, Wënd yɪtame n remsd-a yïn-wil-kãensã b naasã pugë: A remsd-a-la a wumbë wã, t'a ka womde rënda bũmb ning sën yard Wënde. La A remsd-a a ninë, t'a ka get rënda sën tug bũmb ning Wënd sën nong tɪ b gese, la A yardë wã. la A rems-a a nugë wã, a ka tumd ne a nugã, rënda bũmb ning sën yard Wënde. La a rems-a a naoorë, t'a ka kënde, rëndame tɪ yaa sën na n tug bũmb ning sën yard Wënde, la a ka maand tuumde, rënda sõma sën beë la a kënda. Sën lagem ne wã fãa, a sã n kos Wënd bũmbu, Wënd kõt-a-la a sën kosã, rënd nedã yɪta b sën reegd a soab kosgo, a sã n kos gũudum ne Wënde, n dell Wënde, n bao gũudum ne-A, ad Wënde, (A Naam yɪlgame), A reegda a kosgã la A gũ-a n yi bũmb ninga a sën yeεsd-a. Rë poorë tɪ Wënd yeele, (A Naam zëk yã): la Mam ka maand maas-maas ne bũmb Mam sën rat n maan, wala M maan maas-maas muumin yõorã reegr pugë, tɪ yaa yolgs ne muumin, bala a kisa kũumã, zabdem ning sën be a pugë wã yïnga, tɪ Wënd me yaool n kis bũmb ning sën zabd muuminã.

النجاة الخيرية  
ALNAJAT CHARITY

